

四庫全書

集部

欽定四庫全書

集部

文莊集卷一至三

詳校官監察御史_臣李陽樞

檢討_臣何思鈞覆勘

謄錄監生_臣趙珍

謄錄監生_臣龍舜耕

謄錄監生_臣孫永治

欽定四庫全書

集部三

提要

文莊集三十六卷

別集類二 宋

臣等謹案文莊集三十六卷宋夏竦撰竦有

古文四聲韻已著錄其集本一百卷宋史藝

文志著錄今已不傳茲據永樂大典所載兼

以他書附益之尚得詩文三十六卷竦之為

人無足取其文章則詞藻瞻逸風骨高秀尚

有燕許軌範歸田錄青箱雜記東軒筆錄中山詩話玉海困學紀聞諸書皆稱引之呂祖謙編文鑑亦頗採錄蓋其文可取不以其人廢矣集中多朝廷典冊之文蓋所長特在于是所載事迹如太宗為京兆尹時召見魏咸信事在乾德五年而史以為在開寶中澶淵河清見底事在端拱元年而史以為在雍熙四年竦之直集賢院以獻文得官而史以為

自通判召入凡斯之類皆足以訂宋史之訛
他若李昉之追封韓國公王曾之為兵部郎
中魯宗道之為給事中任中正之為右諫議
大夫史皆失書凡斯之類亦足補宋史之缺
蓋托克托等年遠傳聞不及竦紀錄時事為
得其實也集中表奏有代王曾王旦寇準諸
人作者考之史傳竦在洪州能斷妖巫毀淫
祠仁宗時增設賢良等六科復百官轉對置

理檢使亦皆竦所發好水川之事議者歸咎韓琦竦於任福衣帶中得琦檄奏之明其非罪則竦雖巧伎較之丁謂王欽若輩尚稍稍有間故正人尚肯假手歟抑或為所籠絡當時尚未遽悟其姦也竦學賅洽百家及二氏之書皆能通貫故其文徵引奧博傳寫者不得其解往往舛訛今參考諸書為之是正各附案語以明之其不可盡考者則姑仍其舊

從闕疑之義焉乾隆四十六年九月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

提要

文莊集原序

繇文章取賢科位宰執流風遺烈光華休暢在漢有之
公孫季以慎厚而飾儒雅通于治道在唐有之裴寬中以
峻整而持法度協于柄用在本朝有之鄭國文莊夏公
以哲乂而經文武穆于天緯是皆為當世偉人表的于
後公孕昂之精降崧之靈洞九流之指歸漱六藝之腴
潤年甫及冠業已大成于時章聖皇帝罷兵和戎留好
典籍物色遺逸寤寐暖良始闢六科親策多士公試三

千言子政事堂遂敷秘廷對清問天子擢以優等聲光
四馳褒渥有加方朝家擁瑞物興禮文叅夷丙之御訪
鬼神之本公番直儒館屢賜延見形容上德時奏賦頌
洎通衡石之擘數夸美于丞輔會詔諸儒輯君臣故事
分釐部類公謨別序為多復預編修國書仁廟啟藩在
潛命公傳以經義兼筭牋記極一時之選乃陟詞掖入
禁林鼓動雷風藻澤謨訓朝廷大典冊多屬于公公亦
感慨榮遇攄發淵蘊及毗宰政建言復制舉以取宏博

之彥復百官轉對以通下情置理檢使以達寃滯時論
翕然又以三長之筆克就信史及退釋重任服在大僚
寶元中種羌畔換西鄙不靖公以兼備之材簽揀素定
擁旄推轂付以專閫既而起居兵間以新書李法從事
嘗奏議邊十策多蒙施用經畧懷來卒業異俗于是佩
相印冠樞廷荒大國之封峻常伯之秩雖寵靈綢繆而
益懷驚畏學士楊公察草麻制謂仲尼不容周公胥怨
豈得其時而未盡其志耶然烜赫隆盛彌四十年以文

致身稽古之力其極矣哉自公出處中外勤勞王家大
編鉅軸襮積私楮歲月其逝弗皇綴緝紙蠹墨蟻頗有
墜逸公既薨而嗣子亦謝世元孫尚書比部郎中伯孫
諉故吏工部郎中張君宗益祕閣校理裴君煜彙次遺
集成百通後數載見俾序之公嘗論文以氣骨為主詆
時輩所作如繡屏焉于書無所弗通以至陰陽律歷隸
古之學莫不兼總以為天下之樂無如黃卷中也屬思
深湛構詞緻密此翰就簡竄塗不已歸于至當乃可允

善章奏鋪賦顛末言詳意盡蓋會萃衆說而撮其真粹
包括曩製而豐其條幹如至音純繹金石奏于宗廟華
采煥爛黼黻施于象服後之學者鑽仰之範模之景山
學海可得致歎宗敏求謹序

有宗文莊夏公挺生于祖宗朝其文溫厚謹嚴發乎性
情而動有典則如文靖李公文正王公之在朝一時化
之風聲氣俗訖無叔季澆漓之習其間琢句警聯嘉言
謹議膾炙人口至今不絕而尤工于表章制誥雖使琳

瑤常楊復生未易遽出其右信矣文章之與時俱高也
邈游學時得公牋表一通于都市固已玩之有日常恨
未睹其全比倅江夏遇湖北漕使直閣公之宗支也適
兼郡印蓋嘗從容語及遂蒙出其家藏凡百卷以示因
付鏤工以廣其傳工既告畢于是屬邈序之邈常竊笑
文人之尚祕其家集為私淑之計一遭變故已亦不能
有之或覆見有于人甚者灰于劫火靡有孑遺卒之其
先無傳焉使聞茲舉頗其厚矣廼不辭而僭書之紹興

庚申上巳左奉議郎權通判鄂州軍州兼管內勸農營
田事江邈謹序

文莊集原序考證

第一頁後八行 按宋史仁宗本紀天聖七年閏月復制舉六科復字原本訛作後今改正

第二頁前四行 李字原本訛作季按漢書胡建傳黃帝李法注云李者法官之號搃主征伐刑戮之事竦傳言治軍尤嚴敢誅殺即序中所云也今改正

欽定四庫全書

原序

欽定四庫全書

文莊集卷一

宗夏竦撰

制

兵部侍郎趙安仁可尚書右丞制

初國家祖功宗德丕顯於大猷廣記備言允資於實學
屬成書而奏御宜加等以推恩具官趙某性尚淑均儀
操溫重有淳正之德服於搢紳有雅興之文表於臺閣
自頃參朝政首譔信書屢易歲時備觀良直况宣明於

先烈宜峻異於寵章特進秩於中臺實陞榮於右轄肅
茲六職更勵乃誠可

左諫議大夫充集賢院學士孫僅可給事中餘
如故制

勅國家軍慶汾睢逮茲六稔庶官考績咸叙其勞眷乃
侍臣宜加寵異具官某瓌行明識成於夙齡麗藻清規
冠我時彥而自諫垣引籍僊殿兼榮于彼藩宣奏課而
連最審茲邦憲處法以甚平績用居多歲月滋久俾擢

居於瑣闥用特聳于朝榮往踐厥官更圖來效可

樞密直學士右諫議大夫任中正可給事中餘

依舊制

勅汾睢均慶積有歲時考課最於官司已陟明於羣吏
眷繁劇於京府宜疏寵於侍臣具官某學識該通詭致
宏遠積純粹之性懷幹裕之材而自入直樞廷兼榮諫
省藩宣巨屏惠撫於黎蒸尹正中畿肅清於豪右惟積
勞之滋久宜信賞之有加特進秩於瑣闥俾增崇於密

侍荷茲寵異無怠乃誠可

右諫議大夫參知政事魯宗道可給事中餘如

改制

勅朕紹隆景業大庇中區實賴股肱之臣變和天地之道務在尊寵式表眷懷具官某神稟嶽靈氣載弦直文章雅正道藝深明方重敢言忠厚無間簡自先聖輔予冲人不吐剛而茹柔常疾非而甄善倡率羣后翊贊正司洽茲重熙莫匪嘉績宜升勞於瑣闥示嘉寵於黃扉

更賴盡規奉若時命可

翰林學士左司郎中知制誥李維可中書舍人

餘依舊制

勅國家五壇布慶六載于茲庶位陟明久從於鈎校近
臣凝績特舉於徽章以爾具官某瑞世明姿慶門華緒
立言以道無外獎之勤虛已待人有不疲之鑒而自陞
華禁省列職中臺夙夜浚明得大夫之體訓詞深厚合
王者之言而星火屢改於新陽車服靡登於舊數是用

簡自朕意俾圖爾勞宜正秩於綸闈用增榮於密侍膺
茲異選更勵乃誠可

祠部郎中李湘可依前祠部郎中充三司度支
副使制

勅度支之職懋遷有無食足貨通具有前訓故其副貳
尤在得人以爾某勤瘁首公端和毓性頻繁事任履歷
歲時朕昨以洙泗名區真靈所降欽修靖館茂集鴻禧
方總均輸罄宣懿力宜副版圖之任庸旌幹裕之材更

勵乃誠以稱朕意可

侍御史黃昭並可刑部員外郎充三司戶部副

使制

勅朕觀在昔量能授事地無曠土邑無游民今之會府
寔領其政為之貳者甚難其人以爾某為學該明資性
溫重而自飛英憲府凜行朝倫擢從金穀之司授以藩
宣之寄思慮深遠政治寬平藹然休聲達於朕聽是用
寵以郎選俾贊計臣更務竭誠以荅殊獎可

工部郎中兼侍御史知雜事趙積可依前工部
郎中充三司鹽鐵副使制

勅謹正鐵官修舉鹽筭民不加賦經用益饒必得其人
以貳厥職以爾某操履溫肅志尚端平方面均輸勤勞
於漕事憲臺雜治審克於爰書俾佐計臣必有嘉效勉
思盡瘁以稱朕懷可

太子右贊善大夫監通濟粳米第一倉李明可
殿中丞餘如故制

勅某等國家分命攸司大校羣吏及勞而賞惟恐後焉
以爾等勲蔭起家文辭中選勵精官次率職賓筵善最
有聞考覆斯允或升華中御引籍東朝或述作蘭臺參
丞棘路並為清舉勉稱朝榮可

大理寺丞白波發運判官王直可守殿中丞制
勅某等夫發辰中御畫諾春坊並預通閨尤為妙簡以
爾等藝文秀峙政治寬平連最有聞在勤可紀宜陞朝
著以勵縉紳勉罄乃誠荷茲殊獎可

太子洗馬知陵州軍州事楚用和可殿中丞餘
依舊制

勅某等竭心從政潔已在公積有歲月之勞登於考課
之制中御司衛超進屬丞往欽厥官無忝朝命可

大理寺丞同判永興軍張保雍可殿中丞餘依
舊制

勅某京兆舊區實屏西夏惠綏之政方倚於忠賢倖貳
之材甚艱於選授以爾韻宇淹粹學問該明自佐于蕃

常聞竭慮宜丞中御之府仍贊司雍之臣更務首公以
荅朝獎可

太子中舍監建州造茶兼買納茶務余良孺可
殿中丞餘如故制

勅某國家以封域之廣命中都官出幹外事三載有成
就加爵秩欲其昭勸之速也爾等早列閭籍閑練國章
往佐牧民之官或領摘山之務閭閻永上歲月當遷中
臺望曹東序顯秩洎丞屬於御府皆仕進之榮塗差賞

金史卷一百一十五
卷一
爾勞以觀來效可

東頭供奉官閣門祇候王懷忠可內殿崇班依
舊閣門祇候制

勅某早列官常存經事任歲時滋久勞効可嘉特疏寵
於近班仍兼榮於上閣勉思勤瘁以答甄明可

翰林院藝學殿中丞同正蔡齊古可依前殿中
丞同正充翰林院待詔制

勅漢金馬有待詔之臣備清問侍從之職唐禁林有執

藝之士陳太古雅正之聲朝廷因之並建其選以爾具
官某早工絕技克暢治音宜書歲月之勞式獎均調之
業往階顯秩無忝隆恩可

秘書省著作佐郎知蜀州晉源縣事張錫可太
子右贊善大夫餘依舊制

勅某等明經中選敏學登科竭節効官在公凝績攸司
大校賞典並行是用進秩上臺升華中御或飛榮於鶴
禁或佐局於蘭臺各勵乃誠以荅朝獎可

秘書省著作佐郎知蜀州永康縣兼兵馬監押
任文素可太子右贊善大夫餘如故制

勅某等國家考課績差善最所以辨百工之能求四方
之政者也以爾等早中朝選恪居官次勤宣幹力修奉
彛章歲月貿移職用備舉攸司大校信賞並行引籍外
臺振纓中御洎春坊之畫諾皆仕路之美遷更務夙宵
無忝恩獎可

大理寺丞李象之等可太子中舍餘依舊制

勅某等經術該通吏能幹敏振纓理寺陟狀甚明結綬
賓筵薦章交上或陞華於鶴禁或佐職於棘卿各示甄
陞勉思自效可

大理寺丞充三門發運判官錢智周可太子中
舍餘依舊制

勅某等國家以功詔祿以能奠食申明善最之格旌辨
勤勞之臣所以勸天下以至公也爾等各負吏能屢分
朝命竭心從政潔已在公美課有聞賞典斯在宜進銅

靡之職或參棘路之榮更務聿修以永終譽可

大理寺丞知絳州翼城縣姜矜等可太子中舍

餘依舊制

勅某早踐官榮克彰幹力及有考覈引對軒墀宜用陟
明以旌勤效或青闈振藻實踐於朝闈或棘路陞華共
評於李法勉膺甄獎更勵夙宵可

太子中舍張行簡並可舊官制

勅某等早列官榮遽丁艱疚孝惟不匱誠合終身禮有

外除固難過制宜還官秩俾遂資忠可

工部郎中張士遜可戶部郎中直昭文館充壽

春郡王府官制

勅朕以愛子膺封建之禮慎選端士以輔導之俾其居
處出入之際聞忠孝方正之言故朕久思其人未易輕
授自非耆重孰副柬求以爾具官張某資惟淑均理尚
清簡糾彈憲府漕輓外臺端懿之風碩茂斯允以爾具
官崔某業文甚雅守道不迴引籍諫垣勵精史局老成

之德慰薦良多是用簡自朕心命之王府第進左民之秩或兼上館之榮爾其祇荷寵章協宣懿效規諷禮誼以臻於道予有望於汝也可

案真宗本紀大中祥符九年正月壬申以張士遜崔

遵度為壽春郡王友故制詞有具官張某具官崔某之語乃制詞既明列二人而制題則舉張遺崔殊為踈畧又考遵度本傳真宗祀汾陰之歲命為左司諫七年降為右正言踰歲復秩九年命與張士遜並為王友改戶部員外郎則知遵度之為王友時以左司諫而加員外郎也但無別本可據姑仍其舊附記於此

起復雲麾將軍解州刺史本州團練使郭崇仁

可檢校工部尚書加食邑二百戶制

勅國家奉帝真之徽稱展郊廟之盛容提福縣區推恩
有位具官某威英御衆智勇出人學茂兵鈴識通民政
而又常參密命久奉戎昭功著邊陲家傳勲戚其或入
奉朝請分刺藩宣任團結之崇資奉防秋之重寄克宣
懿力綽有休聲方需純禧宜隆異數或增榮於視秩或
加賦於爰田洎登馭貴之階並示疇庸之典各思況瘁
以答寵靈可

起復雲麾將軍解州刺史充本州團練使郭崇

仁可落起復授金紫光祿大夫餘依舊制

勅某彞鼎傳勲詩書稟訓早列通侯之貴遽銜陟此之
哀爰及外除宜加茂寵俾進階於三品仍視秩於六官
並隆團結之榮更勵夙宵之節可

給事中錢惟演可工部侍郎制

勅國家雖壤均恩積年滋久羣吏大校鮮有陟明眷惟
邇臣宜用加寵具官某豐規映古雅望冠時盡瘁夙宵
克宣於幹力周旋清要咸服於懿文況其世有大勲紀

在王府顧久居於瑣闥宜擢貳於冬卿欽踐歛官以副
朕意可

翰林學士給事中知制誥陳彭年可工部侍郎
餘依舊制

勅朕以頌次先猷總裁大典誕播無彊之美寶資命世
之才式慶成書宜加茂寵具官某清徽映世景行服人
閑練典章周旋要近辨禮樂升降之數敦訓辭深厚之
規明識遠猷藹於時望而自鋪觀注記紬繹信書約五

始之舊文宣兩朝之鴻烈時乃之力朕甚嘉之宜擢貳
於冬卿用增榮於禁省服茲休命更竭乃誠可

翰林學士工部侍郎知制誥晁迥可刑部侍郎

餘依舊制

勅國家頌次祖宗之典允資碩茂之才既紬繹以成書
寶精研之備至宜推異渥式獎名儒具官某局致淵通
資氣淳素韞深厚之學藻潤於訓詞敦棲約之風靜一
於流競表儀羣士茂聳明姿而自總緝舊章編研史策

歷年滋久宣力居多宜擢貳於秋卿俾增輝於內禁勉
膺寵眷無怠欽承可

給事中參知政事張知白可工部侍郎加食邑
五百戶食實封貳百戶制

勅國家奉天尊道茂集於多儀論德第功誕均於純錫
眷惟良弼宜聳朝榮具官某字韻中深志尚棲約總生
人之嘉秀蹈先哲之高衢內閣陞華竭誠而備問外臺
執憲正色以在公簡自朕心俾參柄用清機足以照理

興學足以詢謀一德惟新九功咸序而自薦靈辰之實
號奉真祖之丕稱登徽謚於太宮報繁禧於陽位講求
故實贊相盛容陟降無違聲名允穆時乃之力朕甚賴
之特擢貳於六卿用加崇於四近仍增食賦併示徽章
噫隆罷大名務從於褒異密謀潛慮實佇於將明勉罄
遠圖共熙至治可

樞密副使禮部侍郎晏殊可刑部侍郎餘如故
制

初內樞之重密命是資允賴忠賢參綜兵要眷惟勲舊
宜峻等威具官某道藝該明資性方裕自懷名教之樂
淡於榮進之塗簡自先朝列於儲案輔朕初載克暢於
大猷登汝近司愈昭於懿德宜進天臺之秩用增機軸
之崇更佇訃謨啟迪予志可

起居舍人知制誥判昭文館盛度可工部郎中
餘依舊制

初國家均慶頌祇之宮多歷年所大校羣吏之治咸叙

其勞在於侍臣宜有殊寵以爾具官某周才敏用興學
雄文演潤之詞日彰深厚之美銓衡之任時推平允之
材以次近班彌昭令望宜正名於郎位俾增美於掖垣
更務誠明副茲甄獎可

刑部員外郎知制誥新知揚州王隨可工部郎
中餘依舊制

勅某朕魏睢車慶多歷歲年中外庶官已從考陟左右
近職宜有褒優以爾早列綸闡出司留籥能以寬政惠

茲蒸人方別寄於藩條宜特隆於郎選佇聞治迹以稱
朕懷可

翰林學士主客郎中知制誥王曾可兵部郎中
餘依舊制

勅均慶隆睢歲時滋久陟明羣吏甄獎居多眷惟清近
之臣宜茂褒優之典具官某韻宇宏遠資氣淑均潔已
無瑕早勵懷霜之志當官有守克彰匪石之心自振藻
於禁林實飛英於雋域年華屢改時譽彌芳宜進秩於

中臺俾增輝於內省佩服優寵更務夙宵可

職方員外郎閻仲卿可屯田郎中知耀州制

勅某資性矜嚴當官盡瘁洊更事任屢易歲時將泣近
藩對於便坐俾正握蘭之秩用增分虎之榮善愛吾民
以荅殊寵可

刑部郎中充龍圖閣待制查道可右司郎中餘
依舊制

勅朕自祗薦坤靈洊歷年所考陟載行於庶位甄陞宜

厚於邇辰具官某性本溫良識惟清達回翔近署克遵
慎密之規典掌攸司允著公勤之績爵有詞藻頌其聲
明以稽茂恩未副朝論特進中臺之秩式增內閣之榮
更勵誠明表予眷待可

三司鹽鐵副使刑部員外郎段暕可吏部員外
郎餘如故制

勅國家重慶汾睢于茲六稔庶官大校咸用陟明繁劇
宣勞特宜疏寵具官某等操履端肅器局淹通貳乃計

臣度茲邦賦籠山澤之利公家之用咸充積歲月之勤
鉤考之文未至用特進於賞典俾俯勸於能臣祇荷寵
章更思況瘁可

王旦弟度支員外郎判國子監旭可尚書司封員
外郎餘依舊制

勅某上帝降衷賚予良弼交修封祀之典宣臻揖讓之
治佑我鴻業格於皇穹哀哉云亡追悼何已眷乃同氣
素有令名避金穀之要司總膠庠之學館賞延之寵宜

異於常勉繼前修式光華緒可

屯田員外郎同判定州張檄可都官員外郎餘
如故制

勅某朕以郡縣之治責在庶官三年有成急於加賞故
有就進爵秩以勸勤勞者也以爾業文中選厲節首公
闕決郡條熟習吏事有司會課善最居多建禮增榮命
數滋重勉思幹裕以答寵靈可

屯田員外郎監荆南鹽麴商稅務陳易從可都

官員外郎餘如故制

初某等有虞氏之制三載考績黜陟幽明朕舉而行之
以勸臣下以爾等服勤官次各有吏能校課最於攸司
上閥閱於宰府宜進文昌之秩或升中御之丞各荷寵
靈更圖求效可

新差荆湖北路提點刑獄太常博士江嗣宗可
屯田員外郎餘依舊制

初勞臣不進材臣不勸故朕宣明考績甄序流品以爾

具官某等服勤官次引籍朝闈綽有政能多歷年所爰
觀陟狀用錫寵章司興建曹墾田列職臺郎之選於是
為優勉竭乃誠無忝休命可

太常博士知廣德軍陳覃可屯田員外郎餘依
舊制

勅某等古者以尚書郎主屯田積穀之事以充經用國
家頗重其選未易授人今爾等辭職該明吏事周敏任
勞可紀會課居多以升厥官更佇來効可

太常博士知眉州劉忠正可屯田員外郎餘依

舊制

勅某等漢魏以尚書郎主墾田虞衡之事分曹建禮職亦甚重以爾等清潔秉志勤勞首公或守郡坤維或詳刑嶺表皆以吏課列於有司考覈以聞陟明斯在第陞華序用勸朝倫欽踐厥官更思况瘁可

太常博士充秘閣校理韓義可祠部員外郎餘如故太常博士胡淳可屯田員外郎制

勅文昌政化之本臺郎要近之官儻非時材曷稱朝選
以爾韓某藝文深厚躬博雅之姿胡某吏理精詳懷清
白之操並處曲臺之秩或叅祕館之榮第課當遷賞勞
斯在宜分曹於建禮俾應宿於太微勉勵清修無忝朕
命可

國子博士侯自成可虞部員外郎制

勅某奧學名家周才幹裕游更事任克著勤勞宜自成
均俾參郎選分曹建禮實總虞衡足謂美遷勉思盡瘁

可

太常博士朱頔可也田員外郎制

勅某懿文中選慶胄承芳竭志臨民薦章交上勤心殫
務美課居多考績攸司引對便坐簡自朕意俾圖爾勞
或超踐於天臺或第陞於棘路各欽異渥共勵乃誠可

太常博士盧宗可也田員外郎制

勅太微積星蔚為郎位選授之際所宜得人以爾某早
業懿文世蹈方穀曲臺引籍列郡班春奏最居多考課

斯允是用擢之省局實掌公田欽踐厥官無忝休命可
比部員外郎通判泉州徐仲翔可駕部員外郎

制

勅汝承榮閨籍通守泉山奏課攸司備觀於幹力疇勞
省局宜進於望曹善撫遠民以稱朕意可

監察御史知陝州軍府事李階可殿中侍御史
餘依舊制

勅某分陝輿區介於司雍控引川陸蕃輔京師共治之

臣甚難其選苟得良牧何吝寵章以爾文藝優深識度宏遠頻繁事任淹歷歲時潔已臨人在公正色滑鄭之治民甚便之宜進榮資俾臨劇郡必有嘉効以稱朕知可

前侍御史呂言並可舊官制

勅某等早通閨籍遽執親喪欲報之哀固云罔極免懷之制蓋亦難踰宜及外除還其舊秩更思移孝以永揚名可

秘書省著作佐郎鄭隨可秘書丞制

勅其中秘書丞右文清選以爾早登榮級屢奉官箴有
司疇勞便殿引對授以斯職實踐朝闥尤為異恩勉圖
來効可

光祿寺丞朱正辭可秘書省著作佐郎制

勅某著作之局頌次信書妙簡清材以佐郎選惟爾先
正項在禁林奉身自高朕甚嘉賞果有令嗣克紹清聲
飾吏以文首公為操當其考績是用陟明往踐厥官勉

圖來効可

前泰州軍事判官試大理評事趙定可秘書省
著作佐郎制

勅某茂蘊時材勤宣幹力歷年滋久奏最居多引籍芸
扃陞華月寺第勞而授無怠欽承可

前興州軍事推官桑衍可秘書省著作佐郎制
勅某著作之廷昔為史局佐其郎選必簡賢勞今某早
擢科名當參幕畫勤勞匪懈稱薦居多宜有甄陞以勸

清慎可

前保慶軍節度推官趙應言可秘書省著作佐

郎制

勅某朕博選羣材並建衆職有善可賞未嘗遺之以爾
榮名詞科從事戎幕當官有守潔已無瑕擢自羣倫必
有招勸中秘之屬選授甚清更勵乃誠以荅休寵可

故司空致仕贈尚書令追封韓國公李昉孫男

昭邈等可試秘書省校書郎制

勅某在昔乃祖克享隆名良規未改於正司茂烈尚藏
於盟府屬均鴻慶宜齒後昆勉膺試吏之榮無息亢宗
之志可

秘書省校書郎制

原本闕除
授人姓名

勅某策名桂籍試吏芸局求歸養於蘭陔已屢遷於圭
籥覽守臣之列奏知爾父之有瘳俾再踐於初筵仍就
趨於近郡用旌孝則以佇忠規可

內殿承制閣門祇候吳元慶可供備庫副使制

勅某軒墀之列諸使為優推選賢能以貳其職以爾生
於鼎族早佩官箴歲月屢遷勤勞匪懈宜有加賞俾預
近班祇荷寵靈勉思況瘁可

南作坊副使錢守吉可供備庫使制

勅內外諸司分置使領軒陛之右秩甚優殊以爾某局
致淵通儀範肅服勤官次屢易歲時况其世有茂勲
書在盟府宜推恩典俾正職名勉罄乃誠更圖來效可

中允知榮州公孫儀可太常丞餘依舊制

勅某等竭慮首公勤心幹裕有司較其課最宰府詳其
闕閱名在賞格朝命是行或引籍曲臺或發辰中御各
欽茂渥更勵乃誠可

殿中丞新差通判石州和郁可太常博士餘依
舊制

勅某等引籍朝闈服勤官次考其課最時用陟明或命
秩於曲臺或陞華於中御各膺茂典更勵乃誠可

殿中丞知開封府司事參軍楊信可太常博士

餘依舊制

勅某朕並建衆職分又中區念勤簡勞惟恐不及以爾
懿文中選亮節首公識度清和操履方雅考其底績合
預陟明曲臺禮官舉以授爾噫天府浩穰牒訴倥偬糾
繩之重爾方居之勉宣令猷以荅殊獎可

前太常博士任中行可太常博士散官制

勅某懿文中選幹力首公擢倅浩穰徧游肯綮方展授
虛之乃遽貽藉藁之愆屬茲均禧特從牽復勉圖况瘁

以荅朝榮可

殿中丞通判河南府王正倫可太常博士制

勅具官等虞舜陟明之典成周鈎考之法朕總而行之
以辨羣治爾等懿文中選茂學承家咸奉官箴並成吏
課宜有甄賞式勸勤勞訓禮曲臺詳刑棘路各欽異渥
共勵乃誠可

太常寺奉禮郎任同可舊官服闋制

勅具官執喪之禮式及外除掌禮之司所宜復序恪居

乃職無怠資忠可

文莊集卷一

欽定四庫全書

文莊集卷二

宋 夏竦 撰

制

衛尉寺丞趙鼎可依前尉寺丞兼宗正寺主簿
制

勅某國家率陶唐先親之典右宗周宮正之任妙選同
姓以備屬僚以爾早著吏能克勤官守俾兼勾稽之闕
更觀夙夜之勤可

故守太尉尚書令王旦男大理評事雍可光祿

寺丞制

案王旦傳旦薨後錄其子弟姪外孫門客常從授官者十數人此制云矧保家

之令嗣洎猶子之惟親即傳所云錄子姪事題中舉子遺姪當有脫漏

勅某等朕得良相登翊大猷擢士以公處身以約四近之位萬方是毗國之彛章歲有勲蔭每自謙抑罕欲奏言及此云亡深用傷悼矧保家之令嗣洎猶子之惟親咸有懿文並承清德宜推延世之賞式彰有後之榮各務進修承茲閥閱可

將作監丞知大寧監張師顏可大理寺丞餘依

舊制

勅某襲慶德門隸官繕監周旋事任縣歷歲時考績有聞賞勞斯在參丞棘路更厲乃誠可

前衢州軍事推官范謂可大理寺丞制

勅范謂爾久列初筵克陳婉畫薦章交上考績攸同棘路屬丞疇榮而授更思況瘁以答殊榮可

前京兆府觀察推官冉宗元可大理寺丞制

勅某朕每臨便坐親對羣吏至於肝旻以觀其能汝早
列賓筵克明政事宜從簡擢以懋勤勞往丞理官勉副
殊獎可

大理評事祕書校理通判渭州王夷簡可大理
寺丞餘依舊制

勅某隴阪故區西陲要郡汝闕掌其政幹力有聞考秩
將終邊臣奉請俾加榮於棘路仍典校於祕文式遂借
留更觀來效可

前權知單州團練推官廳公事沈澤秀州錄事
參軍鄭知白並可大理寺丞制

勅國家克謹銓筦澄鑒品流妙擇時材分綜羣務以爾
具官鄭某監司慰薦綽有政能具官沈某閎閱具存訖
無痕累簡自朕意俾圖爾勞往丞理官無替厥命可

太常寺奉禮郎監濱州鹽酒稅務陳崇德可大
理評事餘依舊制

勅某等素擅藝文早籍勲蔭並登仕路各著吏能勤勞

有成考較惟允第加寵擢用示陟明勉稱厥官以永休
譽可

太常寺奉禮郎裴德輿可大理評事制

勅某早承華緒式奉多儀爰考踐揚頗彰勞効宜特陞
於棘路俾共猷於丹書勉荷寵章無忘祇慎可

太常寺太祝董仲容可大理評事制

勅某承榮華緒效職曲臺勤勞在公考課斯允宜備理
官之屬共詳丹筆之文更務矜修以永休寵可

殿中丞熊自成可國子博士制

勅某等朕懋建庶官分乂九域簡其勤勞急於勸賞孜孜肝食甚於臣下之求爵秩也以爾等屬言治經各中科級當官釐務並有能稱建禮遷曹上庠引籍陟明之典於是為優勉罄乃誠以副清選可

知饒州樂平縣楊簡除國子博士制

勅朕方崇長學校所以加惠諸生甚渥也則聯教事其間宜得名士爾簡蚤有賢譽不求聞達徒勞縣章益務

持養是以不俟滿歲俾長胄子宜惟諸生又以為善類
勸也可

諸王宮教授兼國子監說書制

勅某朕躬訓宗枝幼皆嚮學思得儒者受之以經以爾
備職均庠勵精弦誦特陞榮於祝史俾善誘於縑緗宜
竭乃誠以答休命可

新除祕書少監致仕胡旦男叔彩可試將作監
主簿制

勅某乃父材名甚茂疾疹久嬰爰列奏封懇辭榮寵方
遂奉身之請特豐延世之恩試吏起家爾當自勉可

太府卿權西京留守御史臺裴莊孫男令孫可
將仕郎試將作監主簿制

勅某爾父官重月卿任分烏府適屬均恩之際亟陳詒
厥之誠宜升試吏之榮俾遂起家之志慎初之訓爾其
念之可

河東轉運副使太常博士王平弟弁可將作監

主簿制

勅某爾兄往臨大鹵實掌飛芻爰拜露章具陳友愛宜錫起家之命俾參試吏之榮當慎厥初以永休寵可

故兵部郎中知應天府兼南京留守司王勗男
太廟齋郎晦可將作監主簿制

勅具官某汝父挺生德門父服王政近付留籥往釐南
都遽茲淪亡深用嗟悼特宜延賞式燕後昆勉勵厥修
以隆華緒可

故光祿卿沈繼宗次男試將作監主簿惟恭可
守將作監主簿制

勅某世濟德芬間藉勲蔭久參試吏方屬均恩俾正職
名更思兢慎可

堂後官主客員外郎提點五房公事劉明恕可
朝請大夫加輕車都尉制

勅國家奉天尊祖裸鬯升禋繼畢盛容誕均繁祉眷茲
碩望宜需渥恩具官某器度清和志尚沖粹博通儒訓

詳練明經而自率職相庭兼榮郎位總轄尤重奉號令以無違勤舊有聞歷歲時而滋久矧在卜郊之始務嚴置絕之儀書詔尤多禮文為盛爾並提綱領無爽規程時乃之功深用嘉賞貴勲榮級併示褒優勉罄乃誠永荷休寵可

堂後官大理寺丞張仁惠等可加輕車都尉制勅某等國家薦寶號於帝真集上儀於郊廟誕推異渥式獎能臣以爾等清慎修身端和毓性該通庶務閑練

舊章自恭事於槐庭常服勤於芝檢詳明率職盡瘁首
公屬茲均慶之辰並進書勲之籍荷茲獎飾更厲乃誠
可

刑部員外郎兼侍御史知雜事吳夷簡可朝奉
郎加上輕車都尉制

勅國家薦薦靈宸之寶號奉真祖之鴻名登徽謚於太宮
報繁禧於陽位休嘉總至慶賜方行況在能臣特隆異
數具官某儀範清肅性尚淑均昭映世之豐規萃高門

之積佑周旋徽序祇慎官箴慰薦之章交於公府敏學之譽溢於朝閨俾雜治於憲臺實勤宣於令望侍祠之際率職茲恭宜進階資仍遷勲級勉修懿德以稱朝榮可

樞密直學士河北都轉運使工部侍郎李士衡
可中大夫上輕車都尉制

勅國家薦號密都欽柴泰時神歡洽茂大慶方行乃眷近臣特隆異數具官李士衡秉節高亮資氣淑均德茂

芝蘭志懷霜雪竭心披藝奧蹟以研幾正色首公雍容
而幹事而自樞庭入直起部升華朔野而南榮河以北
委之漕事克有風聲經用羨饒庶吏清肅方均靈浸併
錫徽章勉罄乃誠以答朝獎可

右千牛衛大將軍致仕蔣文肅可加食邑制

勅某國家奉天尊祖祿鬯升禋誕霈鴻禧周于有位以
爾等資性沉毅茂略淵深祇慎官箴頻繁事任而能覽
止足之分敦避讓之風致政公朝升榮近衛屬此均禧

之始宜推加賦之恩荷此寵靈勉自顧養可

大理評事楊休可衛尉丞制

勅某早階仕路各奉官常考績攸司勤勞可紀升榮卿
寺祿秩為優更務首公以答明賞可

大理評事唐均可衛尉寺丞餘如故制

勅具官某等夙承勲緒久踐仕塗吏課有成朝賞斯舉
震維引藉實擬於上臺環衛陞榮最親於中禁勉服休
寵無怠厥官可

利州路轉運使工部郎中呂言可刑部郎中餘
如故殿中丞同判鄧州朱正基殿中丞知華州
華陰縣事楊政化並可國子博士餘如故太子
中舍知越州餘姚縣事韋覺可殿中丞餘如故
制

勅國家引一代之材布四方之政省錄勤吏日簡朕懷
以爾某等性蹈謙雍治中寬猛往監司於郡國或撫養
於黎蒸咸能首公克底成績建禮司刑之重東庠講學

之榮洎中御之屬丞皆上臺之清舉第勞而授惟政是
繫無替厥官以忝予命可

都官郎中知邢州嚴穎可職方郎中餘如故荆
湖南路轉運使職方員外郎康孝基可祠部郎
中餘如故太常丞同判福州王瀆可太常博士
餘如故太子中舍知鄆州平陰縣事陳保和可
殿中丞餘如故制

勅國家尊右文治重愛生民以臺省之要官釐郡國之

衆務疾非甄善唯恐後焉以爾具官某等心識甚明材
用尤備考其官闕各有事功宜舉成科並增顯秩爾其
除煩就約徇公減私免繼前修無替朕命可

祠部郎中知宣州江嗣宗可度支郎中餘如故
屯田郎中知臨江軍熊同文可都官郎中餘如
故太常博士知岳州張稹可屯田員外郎餘如
故國子博士知榮州趙喻可虞部員外郎餘如
故殿中丞知富順監朱良治可國子博士餘如

故太子中舍同判眉州文可觀可殿中丞餘如
故制

勅郡國朝廷之屏翰牧守生民之父母教化所自選授
惟艱勞之不圖吏將安勸以爾具官某等踐履方格文
劄詳明或處千里之師或貳諸侯之治爰考官閥率如
風謠宜即所居第進榮秩夫清約可以行已寬厚可以
安人勉逮前良無替朕命可

金部郎中知洛州李文著可司勳郎中餘如故

太常博士同判蘇州李意可屯田員外郎餘如
故殿中丞同判汾州馬張可太常博士餘如故
殿中丞同判鼎州甄化基可國子博士餘如故
太子洗馬知汝州襄城縣事乘允恭可殿中丞
餘如故制

勅朕懋建郡吏分幹中區賞以及勞爵以序德以爾等
矩度修絜文理精詳考閭閻之積勤訖更痕殿量功次
而差授並用甄陞勉圖後勲以永終譽可

唐南東路轉運使司封員外郎李適可工部郎
中職方員外郎知鄂州高慎交可屯田郎中祕
書丞知岳州臨湘縣事張惟諤可太常博士祕
書丞知洪州豐城縣事孟虛舟可太常博士太
子中舍知信州上饒縣事賈守文可殿中丞太
子中舍同判信州張同文可殿中丞殿中丞知
白州劉宗諒可國子博士大理寺丞知宣州宣
城縣事查慶之可太子中舍衛尉寺丞知湖州

烏程縣事方仲弓可大理寺丞制

勅國家敦厚治本重惜生民以臺省要官長州縣衆職
復東良偽式備監司勤之可圖寵爾殊等具官某等志
尚清約事任頗繁往幹漕輓之權或分守宰之寄風謠
載舉善最有聞並書厥勞第增乃秩勉遵寬大之詔稱
茲褒異之恩思齊古人以永休譽可

殿中丞田慶餘譚雍並可國子博士太子中舍
畢從善可殿中丞太常博士同判揚州吳待問

可屯田員外郎餘如故太子中舍知汾州平遙
縣事李永世可殿中丞餘如故衛尉寺丞知淄
州淄川縣事李庭堅衛尉寺丞監温州前倉鎮
茶鹽酒稅務向約並可大理寺丞餘如故制

勅以祿詔爵以德懋官順考舊章無尚於此以爾具官
某等政體勤曉風行潔清宜錄乃勲遞增爾秩式旌課
最昭勸官師服此朝榮更當自竭可

屯田員外郎同判池州蕭玠可都官員外郎餘

如故虞部員外郎知蔡州張用可比部員外郎
餘如故虞部員外郎知慈州劉餘慶可比部員
外郎餘如故殿中丞同判鎮戎軍田士亨可國
子博士制

勅國家順天制官數求民瘼量能授爵崇屬時材具官
某等吏事修明風迹沉厚允懷清約之節不持刻敝之
文及此第勞所宜差賞勉圖堪副無忝朕恩可

國子博士知資州高繪可虞部員外郎餘如故

太子中舍知福州吉田縣事沈亢可殿中丞餘

如故制

勅具官某等庸蜀奧區甌閩劇縣往釐民政各奉官箴
宜升建禮之曹式丞中御之府或旌美課以勸庶工可

祕書丞同判延州劉訥可太常博士餘如故太

子中舍知揚州天長縣事徐善寶可殿中丞餘

如故殿中丞楚繼芳可國子博士權御史臺推

直官殿中丞戴融可太常博士餘如故著作佐

郎充北宅諸院教授王式可祕書丞餘如故制
勅具官某等或詳曉政經或兼該學術服勤官次第課
可嘉進秩朝闈寵章斯允更圖來効以答茂恩可

殿中丞同判單州竇處約可國子博士餘如故
太子中舍同判夔州李惟寅可殿中丞餘如故
制

勅具官某早引閨籍往貳郡條議法尚寬持心近厚特
書課第並進官榮善撫蒸人以稱朕意可

殿中丞新差同判鄂州令狐頌可國子博士餘
如故太子中舍新差通判澧州魏瓘可殿中丞
餘如故制

敕武昌江漢之衝澧陽邊要之重今得閨彥往貳郡廷
宜簡前勞以勸來效具官令狐頌博文好古踐履方廉
具官魏瓘飾吏首公志尚清約並有名迹洽于風謠東
庠儒雅之遷中御丞佐之選各欽厥職式副朝榮可

殿中丞知河南府王屋縣事呂荀可國子博士

餘如故太子中舍知青州千乘縣事郭長吉可

殿中丞餘如故制

敕具官某等或引籍朝闈或飛榮儲案出為宰字善撫
黎蒸會課當遷推恩頗厚勉懷清約無忝甄陞可

李遵可洮州刺史充保順軍節度使制

敕臨洮奧區河湟近服久被朝化屏茲西陲乃眷忠臣
俾分邦寄以爾某直方毓性英勇冠人傾金石之心仰
尊於王略勵雪霜之節屢效於忠規是用簡自朕懷擢

居戎閫槐庭視秩賜八柱之貴勲茅土疏封峻三品之榮寵兼官憲府頒賦爰田便繁渥恩度越倫等罄竭誠信保寧塞垣勉守令名副茲旌賞可

侍衛親軍馬軍都虞侯桂州管内觀察使桂州刺史郝榮可荊州刺史充安國軍節度觀察留後加食邑五百戶食實封二百戶制

敕節制兵戎廉察藩翰並司留務允謂隆恩以爾具官某早著事功久司兵要威名克著功次當遷宜靡限於

彛章俾特陞於顯秩更宣忠力以副朝榮可

三司戶部副使禮部郎中李及可吏部郎中充
淮南轉運使制

敕貨食之府條政實繁久貳厥官宜有加寵以爾某等
雅尚冲邃茂學兼該各以時材稱茲劇職勤勞斯久甄
序宜優俾超踐於臺郎仍分總於漕事勉思竭慮以答
異恩可

轉運使並加階勲制

敕國家薦有帝之號奉尊祖之名絜裸玉於太宮展欽
柴於陽位誕均純賜以寵能官以爾具官某等性尚平
夷器能秀峙或振纓學館茂發於懿文或引籍朝閨勤
宣於幹力而自總司漕職恪守官箴慎罰以寬能體好
生之德籠材有道曾無刻下之煩慶賜方行階勲第進
無忘刺舉以答寵甄可

右諫議大夫分司西京宋惟幹等可中大夫進
封開國伯加食邑制

敕國家薦號帝真展窠郊廟眷惟有位咸需鴻恩具官
某等亮節清規懿文茂學或早游清貫秩亞於地官或
屢展幹才任隆於諫省或正握蘭之秩或居象月之崇
或分務於西都或奉身於私第皆著老成之德允昭靜
一之風屬此均禧所宜䟽寵增勞勲品益賦圭田暨加
駁貴之階並示優賢之典欽茲朝命更勵乃誠可

故知古州向光璿男守玠可銀青光祿大夫國
子祭酒兼監察御史武騎尉知古州軍州事制

敕某汝世荷朝榮夙懷忠節特允邊臣之請俾分列郡之權寵數有加國章斯重益輸丹款以答隆恩可

殿中丞李周士可太常博士通判秦州軍州事

餘依舊制

敕某官某朕申命攸司鈎考羣治賞之小大必及於榮以爾清白承家儒雅飾吏歷年滋久奏最居多奉常禮官漢唐重選以旌汝效足表異恩可

秘書丞張慎言可太常博士知房州制

敕某房陵舊區其地巖險授之以政尤在得人以爾學
古効官懿文節政屢更年籥克守官箴善最居多考校
惟允宜隆朝序俾奉藩條噫急吏緩民所至皆治正心
潔已不令而從蚩蚩之氓皆朕赤子善加愛育無忝朝
榮可

青州司馬于祐之可青州長史制

敕某等早預官榮式貽公憲屬茲寬宥咸與惟新勉膺
遷予之恩更勵省循之志可

鈞容直製撰應奉文字孫渥可將仕郎守衛州
參軍依舊祇應制

敕某環衛之師實有武樂汝早為其屬造彼優辭頗積
歲時未預官牒爰加散掾以賞厥勞更務竭心庸資獻
曲可

懷州武陟縣尉張知至可光祿寺丞監西京洛
河抽竹木務制

敕某朕得良弼參秉大鈞密議贊於帝謨清德溢於民

聽殊倫之寵予何吝焉宜從一尉之資擢預九卿之屬
仍移近任用表異恩可

隴州團練使知雄州高繼勲可連州防禦使捧
日天武四廂都指揮使知瀛州軍州事及管内
勸農使充高陽關駐泊兵馬鈐轄制

敕三軍之重四路是威妙柬忠勤總司管府以爾具官
某頻繁事任詳練邊機武節方嚴兵謀沉密宜正防秋
之任俾司扈蹕之師更務訓齊稱茲選授可

澧州進士王宥孚可守本州助教制

敕某刻心文史勵節邱樊積有歲時達于聞聽宜遂起家之望用敦養素之風祇事郡廷無忝朝命可

唐晉國公裴度五代孫坦可鄭州助教制

敕某在昔乃祖實相有唐殲厥兇渠盡力王室歲月滋久功名愈高朕歷選忠良想見風采爰訪樞近得其後昆特霈朝恩以勸來者可

河陽中州習學究朱允修可將仕郎守孟州助

教制

敕某等或學校諸生或鄉閭著姓能散私廩賑彼饑民
以財發身亦可嘉也具有賞典今舉而行各荷寵榮無
忘兢畏可

天雄軍習三傳王範可大名府文學制

敕某汝占籍侯藩潛心經業能以私廩佐于公家賑爾
鄉民濟其艱食宜升郡塾以獎能誠更務矜修以永休
寵可

故保平軍節度使同中書門下平章事駙馬都尉魏咸信可贈中書令制

敕國家褒崇密戚傷悼茂功中鉉聯榮久參於眷倚西臺正位早極於追旌具官某文武兼資箕裘濟美受勲蔭於懷衽稟命畧於庭闈博通禮樂之原周知教化之本而自降嬪魯館推轂漢壇出總藩條入陪鼎席勤王之業紀在太常體國之忠書於甲令方全饗用之福遽興慙遺之哀特加右相之崇用極惟親之贈英魂不昧

尚服寵靈可

故守司空兼門下侍郎平章事王欽若可贈太

師中書令制

敕國有元老遂階成勲天乎難諶曾不慙遺特稽殊等
之禮用章虧體之哀故具官某峻極降神生民總秀逮
事先帝久服大僚勒封岱宗偃仆師節輔致鴻業格于
皇穹肆予冲人靈承景命實賴盡規之力紹隆累盛之
基及茲云亡深用哀悼尚父維師之重周官內史之崇

並刻密章以付幽窆死且不朽永賁忠魂可

故贈侍中楚昭輔贈中書令制

敕朕昨者薦玉真區觀風近甸眷興王之舊壤懷佐命
之勲臣存則懋延賞之恩沒則峻追榮之典具官某端
介自守沈鷺有謀早事先朝罄輸亮節嘗總司夫樞務
實備竭於忠規屬茲均慶之辰宜霈漏泉之澤西臺重
地右相崇資允極哀榮永昭幽窆可

甘州外甥回紇汗王伊魯格勒可特進懷寧順

化汗王制

敕王者孝治萬方益重展親之典恩加羣后務昭崇德
之規矧在吾甥久綏遠略特舉褒優之命用伸眷倚之
懷具官某茂烈傳家英威服衆智慮深邃詳練於武經
志行直方克敦於臣節而自撫臨西夏屏翰中原允彰
保塞之勲特茂勤王之業仍遠修於職貢是愈見於忠
誠實簡朕心特隆朝獎進褒功之懿號兼馭貴之殊榮
賈越等威用旌忠毅噫山河誓寵朕務在於推恩金石

盟心爾無忘於報國終始一志以保令名可

西蕃首領怕克巴可銀青光祿大夫檢校國子

祭酒兼監察御史武騎尉充本族軍主制

勅某性稟忠純志懷剛果來歸德化達朕聽聞宜霽殊
恩以竢忠效可

文莊集卷二

欽定四庫全書

文莊集卷三

宋 夏竦 撰

制

李氏可才人制

勅某謙祗率禮端懿傳芳自恪奉於宸闈實游更於歲
籥久播柔嘉之譽宜推甄獎之恩俾陞嬪侍之榮用勸
肅恭之德欽茲寵渥更勵夙宵可

保大軍節度使同中書門下平章事錢惟演妻

清河郡夫人張氏可追封郇國夫人制

勅良佐奮庸極文武之隆器小君啓國顯山河之盛儀
非疇大功孰預茲典具官某妻方江起詠照史知言珩
璜節於步容蘋藻恭於祭制生彼勲緒儼予柄臣斗極
樞機嘗對宣於密命文昌將相實並應於列躔是增石
窌之封益表鵲巢之德永宜象服以稱徽章可

故信都郡王德彝妻東平郡夫人劉氏可追封

蕭國夫人制

勅國家追寵茂親已疏於顯爵褒崇內饋特舉於徽章
式推漏壤之恩用正從夫之典具官某妻某氏秘儀景
胄作合懿藩奉蘋藻之多儀體山河之盛德披圖問禮
觀史求箴鷄鳴宣輔佐之勤鵲巢懷均壹之美降年不
永遺範傳芳宜開大國之封俾極小君之貴告於茲寧
尚此寵靈可

樞密副使工部侍郎任中正母萬年縣太君劉
氏可進封太原郡太夫人制

勅朕詢求碩德參總樞衡庶政實繁方深於倚賴母儀
尤重宜示於褒崇以爾具官母氏端肅成規雍和毓性
擇隣以處著慈訓而有方鳴玉而朝率禮經而無怠誕
生間傑副朕疇咨宜開列郡之封用正小君之位有家
之慶無尚於茲可

贈鎮南軍節度使王中正妻吳興郡君施氏可
特進封渤海郡夫人制

勅追旌懿德已隆分閭之恩眷乃中闈宜正從夫之典

具官王某妻某氏柔儀祗肅士族輝華動遵鳴珮之音
不失采蘋之職訓內則之禮表式於外姻鑒鷄鳴之詩
儆戒於君子成其高尚之節享茲存沒之榮方銜恤於
帷堂特䟽封於列郡欽膺徽序無怠乃誠可

侍衛親軍馬軍副指揮使保順軍節度使彭膚
妻滎陽郡君鄭氏可進封彭城郡夫人制

勅齋壇進律方增虎旅之權石窠䟽榮宜表鵲巢之德
具官某妻玢璜節步詩史照言作儷寶臣總司穀騎文

昌著象甲令書忠實開大郡之封用示小君之號勉修
闡則以稱徽章可

樞密副使禮部侍郎晏殊妻江夏郡君孟氏可
進封鉅鹿郡夫人制

勅洪惟有帝夢賚忠賢式登用於近司宜寵褒於內饋
具官某妻保阿承訓圖史照言法容潤於山河體柔潔
於蘋藻儷予良弼翊我大猷近入奉於中參已載頒於
象服宜舉從夫之典更開列郡之榮勉荷寵章稱茲徽

序可

左諫議大夫參知政事王曾妻江夏郡君李氏
可進封隴西郡夫人制

勅朕詢求人望參掌國鈞垂拱無爲方倚成於萬務疏
封示寵宜特異於中閨具官某妻某氏婉孌流芳柔嘉
毓性奉蘋繁之職務極於齊莊照圖史之規動遵於法
度儼我良弼茂此嬪風屬茲任德之辰宜舉從夫之典
小君進號近郡疏榮更肅柔儀副茲異渥可

給事參知政事張知白妻太原郡君王氏可進
封瑯邪郡夫人制

勅朕大庇懷生勤求至治爰得良弼方贊於近司乃眷
中閨宜隆於徽序以爾具官某妻某氏謙祇率禮懿淑
傳芳稟嘉慶於華宗茂嬪風於鼎族克謹采蘋之職不
忘照史之規配我名臣貳此柄用夙夜儆戒諒增內助
之勞湯沐䟽封宜進小君之號更思輔佐以答恩榮可
刑部侍郎參知政事陳彭年妻南陽郡君樊氏可

進封南陽郡夫人制

勅朕穆卜忠賢協宣政治鴻鈞播物方佇於嘉猷石窀
疏榮宜隆於內饋以爾某官某妻某氏承徽令族觀戒
女圖動止有嚴不變珩璜之節肅雍成裕克恭蘋藻之
儀儼我良臣成茲懿範宜正小君之位實開列郡之封
更率謙祗副茲寵飾可

侍衛親軍步軍副指揮使建武軍節度使夏守

贊妻進封郡夫人制

郡名
原缺

勅維彼元戎式建靈臺之節眷茲內饋宜增石窀之封
具官某妻鍾鼎傳家山河著德米繁率職珮玉節音作
儷將臣載司禁旅是舉從夫之典特疏列郡之榮欽奉
寵靈以稱徽序可

河北都轉運使樞密直學士工部侍郎李士衡
妻安吉縣君雷氏可進封馮翊郡君制

勅國家事天尊祖並薦鴻名裸鬯欽柴繼成大慶方推
恩於密侍宜流寵於閨門具官某妻某氏率禮公宮奉

嬪冠族采繫承祭務極於齊莊觀史照言動遵於法度
輔佐君子爲我良臣入直樞庭出司漕事忠規載罄時
譽彌優屬方需於純禧宜特褒於內饋左馮興壤進啓
郡封更蹈謙祇以膺徽寵可

侍衛親軍步軍副都指揮使建雄軍節度觀察
留後管勾步軍都指揮使公事彭睿妻北海郡
君鄭氏可進封滎陽郡君制

勅禮成陽位澤浹絲區眷惟將帥之臣宜茂閨闈之寵

以爾具官某妻某氏照言圖史率禮保阿承祭公宮時
中於四德作嬪茂族爲憲於六姻宜增列郡之封益表
從夫之貴可

侍衛親軍馬軍副都指揮使彰德軍節度觀察
留後管勾馬軍都指揮使公事楊崇勲亡母京
兆郡太君王氏可特追封廣陵郡太君制

勅穆卜陽郊式展欽柴之報眷惟良帥方深濡露之恩
是用追榮俾昭遺範以爾具官某母照言圖史率禮保

阿蹈蘋蘩柔潔之規懷山河容潤之德生茲令嗣爲朕
寶臣勇畧冠於六師威聲震於四貉宜旌慈訓進啓邑
封永賁前寔尚茲休寵可

侍衛親軍步軍副都指揮使建雄軍節度觀察
留後管勾步軍都指揮使公事彭睿亡母河間
郡太君劉氏可特追封宣城郡太君制

勅薪樞盛節聿成饗帝之儀介胄純臣宜重顯親之典
具官某母承榮鼎族率治公宮特生材賢爲朕心膂敷

詩書而講藝比金石以輸忠宜進郡封式昭慈範隆恩
不朽永賁重泉可

左騏驎使入內都知澄州刺史張景宗母追封
琅邪縣太君王氏可追封馮翊縣太君制

勅國家事天尊祖裸鬯欽柴鉅典交修繁禧均被眷惟
近職時乃信臣實懷顧復之慈宜峻追旌之典具官某
母某氏祕儀素里垂範通門觀史照言既族姻之爲憲
斷機喻學果似續之其昌生此令人際予身會當腹心

之重委茂忠孝之純誠享斯列鼎之榮每極履霜之感
鴻恩方霈遺範是褒進開大邑之封用極漏泉之寵貞
寬不昧尚服徽章可

誥

前泰寧軍節度副使成昂可太府少卿致仕誥
勅某方州庶務重煩耆年朝命特行則有貳軍之授引
年請老則有致政之榮爾適被寵恩遂陳奏列從人之
欲朕何吝焉俾貳春卿甚優常等何茲渥綈勉自養順

可

尚書祠部郎中胡旦可銀青光祿大夫行秘書
少監致仕誥

勅國家大庇中區實右文治思皇多士粉澤時政況夫
披藝該洽屬言典要之臣故當寵異而優假之以爾具
官某學必傳經文皆約史早冠羣彥聲華籍甚爰在西
掖詔令敏膽久次於外朕常念之而疾疹所嬰封奏來
上辭語懇激覽之依然特遷三品之階仍副中秘之任

服此榮寵勉自養頤可

東染院副使李繼源可左領軍衛將軍致仕誥
勅李繼源自列軒墀屢更事任載觀封奏懇叙高年特
遷環衛之資俾遂奉身之請服此榮寵勉自養頤可

演州團練使右領軍衛大將軍李延渥可左衛
大將軍致仕誥

勅某宣力軍和分榮使竹洎嬰霜露之疾優以環衛之
資而醫砭未平歲華遽改爰達誠於封奏願致政於公

家且進秩於鷹揚俾奉身於私第荷茲休寵更務養頤
可

詔

賜王清昭應宮使王曾等詔

勅王曾等省所奏遇朕乾元節集闕宮道衆於明慶殿
開啟朝真禮念道場一月祝壽錄功德疏二道上進事
具悉卿等總司靖館祇率真科以予誕育之辰罄乃齋
明之懇啟清場於琳殿宣秘蘊於琅函集福眇躬列誠

封奏載惟忠恪尤切歎嘉故茲詔示想宜知悉

賜四宮觀使王曾等詔

勅王曾等省所奏伏遇天祺節集闔宮道衆就紫微殿
轉念真經聖號祝壽寫錄到功德疏二道上進事具悉
卿等恭司靖館肅奉真儀屬首夏之初辰實受符之紀
節祇率焚修之衆廣宣微妙之文聲乃精誠祝予涼德
載惟愛戴彌切歎嘉故茲詔示想宜知悉

又

勅王曾等省所奏爲朕本命之辰就本命殿開啟靈寶
道場三晝夜設醮二百五十八分位及禮念真經聖號
祝壽錄功德疏一道上進事具悉卿等總司靖館循舉
僊科屬予元命之辰祇率棲真之士夙陳醮席刻誦寶
文既善頌以咸周爰露章而列上眷惟忠恪良切歎嘉
故茲詔示想宜知悉

賜諸路節察防團刺史詔

進長寧節
功德疏

卿素蘊忠規早隆朝寄屬母儀之誕節修佛寶之勝因

祇貢疏文祝延壽紀副予孝愛深用歎嘉

賜河陽三城節度使夏守恩乞上壽不允詔

勅守恩省所奏爲乾元節乞朝覲事具悉卿久陟將壇
式臨邊閫屬朕誕生之日願陪會見之班委師律以方
嚴鎮塞垣而尤重難徇封章之請但嘉愛戴之誠所請
宜不允故茲詔示想宜知悉

賜河陽三城節度使并代州馬步軍都總管夏
守恩乞歸本任不允詔

勅守恩省所上表臣齒髮漸衰心誠稍惰乞垂聖念許
覲闕庭儻未允朝天且乞歸本任事具悉卿逮事先朝
素懷方略并護諸將往鎮邊陲請覲於中都洎求還
於本道倚威名而方重賴屏衛以尤深難徇所陳當體
茲意所請宜不允故茲詔示想宜知悉

口宣

賜契丹迴使副至班荆館御筵口宣

有勅卿等遠戒輶車來修鄰好已成儀於歲聘方引導

於都門宜賜宴筵寵茲行邁

都城門外賜保大軍節度使同中書門下平章
事錢惟演御筵口宣

有勅卿寄重藩垣任兼文武協茲良日將首征途宜賜
餞筵式彰異禮今差某官某賜卿御筵想宜知悉

賜契丹賀乾元節人使至班荆館御筵口宣

有勅卿等肅將聘禮來慶誕辰言涉修涂式臻候館特
頒宴賜用示眷懷今差某官某賜卿等御筵想宜知悉

班荆館賜契丹賀長寧節使副御筵口宣

有勅卿等來奉隣歡肅將信幣適臻都輦將錫宴筵眷
惟涉遠之勤用表示慈之禮

天雄軍賜賀乾元節人使御筵口宣

有勅誕辰斯屆隣好彌敦卿等遠奉輶軒來修聘禮宜
頒宴勞式表恩勤今差某官賜卿等御筵想宜知悉

賜宰臣王曾御筵口宣

玉清昭應
宮禮上

有勅疇咨台席昭事真祠惟置使以尤崇宜示慈而特

異體茲注意諒洽多歡今差某官某賜卿等御筵想宜
知悉

賜賀乾元節人使廻至班荆館御筵口宣

有勅卿等來修聘禮允備多儀屬輶馭之言旋命都門
而飲餞用申恩禮當體眷懷今差某官某賜卿等御筵
想宜知悉

賜契丹賀乾元節使副廻至雄州白溝驛御筵
仍傳宣撫問口宣

有勅卿等載涉歸途已臻隣境冒茲炎燠諒叶安和特推慈惠之私用表恩勤之意今差某官某賜卿等御筵想宜知悉

賜契丹賀乾元節人使廻至天雄軍御筵口宣
有勅卿拭玉成儀展軫戒道屬茲炎律載涉修歧特賜宴筵用昭厚意今差某官某賜卿等御筵想宜知悉

賜契丹賀乾元節人使至瀛州御筵口宣

有勅卿等來慶誕辰聿成聘禮眷言旋軫將及隣封載

惟戒路之勤宜舉示慈之典今差某官某賜卿等御筵
想宜知悉

就驛賜契丹賀乾元節人使朝辭御筵口宣

有勅卿等恭持信幣已達隣歡將整輶車言旋驛道宜
申宴賜用表眷懷今差殿頭陳延達賜卿等御筵仍差
樞密副使張士遜押伴想宜知悉

玉津園賜契丹賀乾元節人使弓箭御筵口宣
有勅卿等方居候館屬此暇辰特命射候庶其觀德仍

舉匪頒之式用昭眷異之恩已差樞密使武寧軍節度使守司空檢校太師兼侍中魯國公曹利用押伴兼賜卿等弓箭御筵想宜知悉

賜樞密副使充祥源觀使張士遜禮上御筵口宣

有勅卿任崇機軸職奉靈祠爰協良辰式頒公宴膺茲異禮諒洽多歡今差某官某賜卿等御筵想宜知悉

批答

賜樞密使曹利用等批荅

省表具知翼翼名都肇基盛業煌煌靈物擢秀上冬卿
等彌綸大猷感召嘉瑞既考祥於連葉乃稱慶於露章
將順備形嘉歎無已

賜樞密使曹利用等批荅

覽表具知象日南都興王吉壤屬就盈之良月秀彼茁
之靈芝爰示中樞共觀嘉瑞遽傳芳於史牒用稱忭於
宸闈言念恪恭豈忘歎尚

賜宰臣王曾以下批答

賀正月三日壽星見
又於十二日再見

省表具知履端巧歷淑氣起於東郊觀象靈臺祥星耀
於南極叶長寧之誕節實萬壽之元符載省封章請書
惇史允賴將明之德聿昭孝愛之誠其在歎嘉無忘寤
寐所賀知

賜宰臣王曾以下批答

賀壽
星

覽表具知木正司方疇人觀象告維南之暉烈昭有極
之常符卿等協輔重雍燮和元化爰陳瑞奏祇達宸闡

會逢誕育之期且獻壽齡之祝深爲愛戴尤切歎嘉所
賀知

賜樞密使曹利用等批答

省表具知淑氣布和啓夏正之首序祥星垂耀屬文母
之誕辰允爲壽考之符寶冠纏離之瑞眷惟樞近祇列
奏封詳觀順美之辭深體愛親之志其於嘉尚脩寐增
勤所賀知

賜樞密使曹利用等批答

賢表具知青律布和壽星垂象騰烈輝於南極符至治
於中區卿等登翊鴻樞招來上瑞因靈臺之列奏由車
府以露章援茂實於典經歸美祥於帷幄載嘉忠恪歎
尚寧忘所賀知


賜宰臣王曾以下批答

爲宣示南
京芝草

省表具知商丘畫壤鴻業肇基忽騰菌蠢之英實總紛
綸之貺歸於布政之府表乃致治之功遽推美於藐躬
請傳芳於惇史載嘉忠恪宜徇奏陳

賜宰臣王曾以下批答

覽表具知維彼名都挺生靈卉詳觀圖牒之記最近天
人之符卿等斟酌化源招來瑞命乃歸功於帝室願垂
裕於圖書恭覽奏封良增愧尚



文莊集卷三